

## **Համաժողովի հարգելի մասնակիցներ և հյուրեր**

Նախ և առաջ թույլ տվեք Արցախի մշակույթի, երիտասարդության հարցերի և զբոսաշրջության նախարարության անունից ողջունել Ձեզ և երախտագիտություն հայտնել Էկոտուրիզը Հայաստանում համաժողովի կազմակերպիչներին այս ամբիոնի տրամադրման և հիանալի միջոցառում կազմակերպելու համար: Այս համաժողովը, երեք տարիների ընթացքում վեր է ածվել յուրահատուկ ու կարևոր մի հարթակի, որտեղ մտքեր են փոխանակվում հայկական զբոսաշրջային արդյունքի կարևորագույն բաղադրիչ համարվող Էկոտուրիզմի վերաբերյալ:

Վերջին տարիներին համաշխարհային զբոսաշրջության ակտիվ զարգացումը իհարկե հարցեր է առաջացրել կապված ընդունող երկրներում կամ տարածաշրջաններում զբոսաշրջիկների մեծ հոսքերի կառավարման և ժառանգության պահպանության հետ: Պատահական չէ, որ ՄԱԿ զբոսաշրջության համաշխարհային կազմակերպության կողմից որդեգրած զբոսաշրջության կայուն զարգացման քաղաքականությունը մեծ տարածում է գտել նաև զբոսաշրջային ուղղությունների զարգացման համար պատասխանատու պետական մարմինների, զբոսաշրջության խորհուրդների և այլ շահառուների շրջանում:

Հայտնի փաստ է, որ զբոսաշրջության կայուն զարգացումը ենթադրում է երեք կարևոր սկզբունքների փոխկապվածություն. դրանք են. տնտեսական զարգացում, բնական ու մարդածին ժառանգության անխաթարության ապահովում և ընդունող հասարակությունների արժեքների, ավանդույթների հարգում կամ պահպանում: Բնական ու մարդածին ժառանգությունը համարվում է Արցախի զբոսաշրջության զարգացման կարևորագույն ռեսուրսը և հենց այդ նկատառումներից էլնելով՝ մենք դիրքավորում ենք Արցախը՝ որպես հարուստ և ունիկալ ժառանգություն ունեցող զբոսաշրջային ուղղություն, որը հեռու է մասսայական զբոսաշրջային երթուղիներից. երկու խոսքով՝ թաքնված գանձ:

Արցախի զբոսաշրջային նկարագիրը մեծապես ձևավորվում է 3 հիմնական ասպեկտներով՝ պատմամշակութային, բնական և էթնոգրաֆիկ: Դրա ձևավորման գործում առանձնակի դեր են խաղում հայկական ճարտարապետության գոհարներ համարվող հուշարձանները, բնական լանդշաֆտը, հատուկ էկոհամակարգեր ունեցող տարածքները:

Առավել կարևոր կամ վտանգված հուշարձանների տարածքներում արգելոցների հիմնումը թույլ է տվել ոչ միայն հավուր պատշաճի պահպանել ու կառավարել դրանք, այլև դրական ազդեցություն է ունեցել զբոսաշրջության զարգացման տեմպերի վրա և խթանել զբոսաշրջային արդյունքի դիվերսիֆիկացմանը:

Արցախում գործում է 5 պետական արգելոց՝ տարբեր պատմական ժամանակաշրջանների ուրույն ճարտարապետական կոթողներով եւ բնական հուշարձաններով:

Արցախի տարածքում առաջին պետական պատմամշակութային արգելոցը ստեղծվել է հայտնի Տիգրանակերտի հնավայրի տարածքում, Ասկերանի և Մարտակարետի շրջանների վարչական տարածքներում 2008 թվականին: Տիգրանակերտը՝ որպես պատմաճարտարապետական համալիր, համարվում է հնագիտական տուրիզմի կենտրոն ոչ միայն Արցախի այլև Հայաստանի համար:

Բացի հելլենիստական ճարտարապետության բոլոր կանոններով կառուցված քաղաք լինելու, այն նաև եղել է այգիների մեջ թաղված սպիտակ քաղաք և տեսանելի է եղել շատ հեռվից: Դրա տարածքում գտնվող Արքայական աղբյուրներն իրենց շուրջը ստեղծված այգի-պուրակով, առվակներով և ջրավազաններով հոչակված են եղել որպես հանգստի և ժամանցի իդեալական վայր: Արգելոցի ստեղծման հետ մեկտեղ վերոհիշյալ պուրակի տարածքը բարեկարգվել է, մշակվել է դրա տարածքում դենդրոպարկի հիմնման ծրագիր, որն արդեն իսկ իրագործվում է: Ծրագրին իր աջակցությունն է ցուցաբերել նաև Արմենիա Թրի Պրոջեկտ կազմակերպությունը:

Հնավայրի տարածքում արգելոցի ստեղծումը ոչ միայն թույլ է տվել հավուր պատշաճի վերահսկել այն, կազմակերպել հնագիտական պեղումներն ու հուշարձանների պահպանությանն ուղղված զանազան միջոցառումներ, այլ նաև արդյունավետ իրականացնել համապատասխան զբոսաշրջային առաջարկի ձևավորումը: Արգելոցի տարածքում ստեղծված պայմանները՝ թանգարանը, հնագիտական գոտին, հանգստի և ժամանցի վայրերը, այցելուներին հնարավորություն են տալիս ոչ միայն ավելի հետաքրքիր ժամանց կազմակերպել, այլև դրա համար երկար ժամանակ հատկացնել: Ձեռնարկված միջոցառումների շնորհիվ շատ կարճ ժամանակահատվածում Տիգրանակերտի արգելոցը դարձել է երկրի ամենաայցելվող զբոսաշրջավայրերից մեկը: Այսպիսով, Տիգրանակերտի հայտնաբերմամբ եւ արգելոցի ստեղծումով Արցախում ձևավորվել է մի նոր զբոսաշրջավայր եւս, որն իր ազդեցությունն է թողել զբոսաշրջության կայուն զարգացման վրա:

Մինչդեռ, նոր արգելոցների ստեղծումը մեծապես նպաստել է ոչ միայն պատմամշակութային զբոսաշրջության, այլև զբոսաշրջության նոր ձևերի զարգացմանն Արցախում: Այսպես, 2011 թվականին Շուշիի և Ասկերանի շրջանների վարչական տարածքում “Հունտոի կիրճ” բնապատմական արգելոցի ձևավորումը մեծ խթան հանդիսացավ էկոտուրիզմի զարգացման համար: Արգելոցի բնական եւ մարդածին ժառանգությունը, եւ դրանց շարքում, ճարտարապետական հուշարձանները հավուր պատշաճի ներկայացնելու հնարավորությունների ընձեռնումը, այն դարձրեց էկոտուրիզմի կենտրոններից մեկը: Արգելոցը մենք դիրքավորում ենք որպես բնական և պատմաճարտարապետական ամբողջական համալիր, որն իր մեջ ընդգրկում է 18-19 դարի շինություններ եւ բազմաթիվ բնական

հուշարձաններ: Համալիրն իր մեջ ներառում է “Հունոտ” գյուղատեղին, որը վերաբերում է 18-20-րդ դդ-ին, ինչպես նաև 18-րդ դարի սկզբին կառուցված Հունոտի կամարաձև կամուրջը և Հունոտի ու դրա շրջակայքի մոտ 12 ջրաղացների ավերակները:

Արգելուցում կազմակերպված 5 երթուղիները նախատեսված են տարբեր հետաքրքրություններ ունեցող այցելուների համար: Արգելոցի կազմակերպումը անգամներով ավելացրեց զբոսաշրջավայր այցելող մարդկանց քանակը: Այժմ Հայաստանի լեռնագնացների միության հետ մեկտեղ իրականացվում է Շուշիից Քարին տակ ձգվող քայլուղու զարգացման նախագիծը, որը նաև հանդիսանում է ավելի մեծ՝ Ճանապարհ Թրեյլ համաարցախյան քայլարշավային երթուղու զարգացման ծրագրի մաս:

Այսպիսով լինելով Արցախի գլխավոր տեսարժան վայրերի շարքում՝ արգելոցը վեր է ածվել բացօթյա ակտիվություններ նախընտրող զբոսաշրջիկների կողմից հաճախ այցելվող վայր, թե իր բնապատմական արժեքների և թե մայրաքաղաքից ոչ հեռու գտնվելու պատճառով:

Զբոսաշրջության զարգացման տեսանկյունից կարևոր հաջորդ արգելոցը Արցախի կառավարության կողմից ձևավորվել է 2013 թվականին Հաղրութի շրջանի Տողի մելիքական ապարանքի տարածքում:

Արգելոցը Արցախի Հարավային զբոսաշրջային երթուղու կարևոր մաս է կազմում: “Տողի Մելիքական ապարանք” արգելոցի զարգացումը իրականացվում է զուգահեռաբար դրա վերականգնման և զբոսաշրջային ռեսուրսների ստեղծման ու օգտագործման միջոցով: Տող գյուղը հանդիսանում է յուրահատուկ զբոսաշրջային կլաստեր, որը ներառելով տարբեր տեսակի զբոսաշրջային ռեսուրսներ նաև կարող է հանդես գալ որպես տարածաշրջանային կենտրոն, քանի որ գտնվում է տարբեր տեսակի քայլուղիների, զբոսաշրջային երթուղիների և այնպիսի զբոսաշրջավայրերի մոտակայքում, ինչպիսիք են Գուչավանք վանական համալիրը, Ագոխի քարանձավը, Մեծ Թաղերի ազգագրական կենտրոնը և այլն : Արգելոցի ձևավորումը աշխուժացրեց Հարավային զբոսաշրջային երթուղին, որն մինչ այդ հազվադեպ էր մտցվում զբոսաշրջիկների այցելությունների ծրագրերում : Այն դարձավ երկրի զբոսաշրջության զարգացման գործոններից մեկը :

2014 և 2016 թվականներին ստեղծված Ագոխի քարանձավ բնապատմական Տյաքի պատմամշակութային արգելոցները ևս գտնվում են հաղրութի շրջանում: Զբոսաշրջության զարգացման տեսանկյունից դրանք դեռ արժևորման փուլում են և դժվար է դեռ գնատահատել դրանց իրական պոտենցիալը: Ինչպես մնացած արգելոցները, դրանք ևս ստեղծվել են հատուկ ուսումնասիրման և պահպանական պայմանակարգի սահմանման անհրաժեշտությամբ պայմանավորված, ինչը հնարավորություն է տալու ապահովել հուշարձանախմբերի հնարավորինս

անադարտ պահպանությունը և դրա նպատակային օգտագործումը՝ հետագա զարգացման նախադրյալներ ստեղծելով:

Վերոհիշյալ արգելոցները տարբերվելով իրարից պատմամշակութային և բնական հատկություններով, ունեն ընդհանրություններ զբոսաշրջային տեսանկյունից: Գտնվելով Արցախի տարբեր մասերում, և իրենցից ներկայացնելով կարևոր զբոսաշրջավայրեր, դրանք մեծ դեր են խաղում զբոսաշրջային արդյունքի դիվերսիֆիկացման գործում, կրոնական վայրերից բացի հնարավորություն ընձեռնելով նաև այցելել աշխարհիկ պատմաճարտապետական ու բնական հուշարձաններ:

Ինչպես արդեն նշվեց, զբոսաշրջությունը մեծապես կախված է -տվյալ երկրում հարուստ ժառանգության առկայությունից: Եվ ընդհակառակը, զբոսաշրջությունը կարող է կարևոր ներդրում ունենալ պատմամշակութային և բնական ժառանգության պահպանության և կառավարման գործում, այն կարող է նպաստել ավանդույթների պահպանմանը և ֆինանսավորել ժառանգության պահպանումը: Հաճախ մտավախություններ են հնչում պատմական ժառանգության վրա զբոսաշրջության բացասական ազդեցության մասին: Մանավանդ երբ խոսքը վերաբերում է վտանգված հուշարձաններին, ինչպես նաև հնագիտական վայրերին, որոնք նախատեսված չեն մեծ քանակությամբ զբոսաշրջիկ ընդունելու համար: Զբոսաշրջության քառսային զարգացումը մեծ վտանգ է ներկայացնում թե՛ պատմամշակութային թե՛ բնական լանդշաֆտի պահպանման համար: Մյուս կողմից կայուն զբոսաշրջության զարգացման պարագայում կարելի է հասնել ոչ թե այդ երկու ոլորտների հակամարտության, այլ ընդհակառակը՝ յուրահատուկ սիմբիոզի: Այդ նկատառումները ևս հաշվի առնելով Արցախը ևս ընտրել է կայուն զբոսաշրջության զարգացման ուղին: